

առաջարկեց ծունկի դալ ի յարգանս Հայաստանի ազատութեան զոհերի: Ջօրքը և բազմահազար բազմութիւնը մի մարդու պէս լուռ իջան ծունկի: Ապա զօրքն ու հասարակութիւնը, նւագով, դիմեց դէպի Սորհրդարան, ուր, պատշգամբից, յուզած խօսք ասաց նախագահ Ա. Սահակեանը: Այստեղից, բազմութիւնը շարժեց դէպի կառավարութեան շէնքը և խանդավառ ցոյցեր արաւ: Վարչապետ Ա. Պատիսեանի ճառի միջոցին թնդանօթները աւետեցին ժողովրդին ուրախ լուրը:

Այնուհետև, զօրքը — ճիւղոր ու հետևակ — նւագախմբի ուղեկցութեամբ հանդիսաւոր շքերթով անցաւ Երևանի փողոցներով՝ ժողովրդի ցնծազին ծափահարութիւնների տակ: Քաղաքն ընդունել էր տօնական կերպարանք: Տներն ու խանութները զարդարւած էին դրօշակներով ու գորդերով: Երեկոյեան եղաւ հրավառութիւն, իսկ կայարանից «Ազատամարտ» զրահագնացքը լուսաւորում էր քաղաքը:

Ամբողջ օր, մինչև ուշ դիշեր, մայրաքաղաքը տենդազին վիճակի մէջ էր: Երկրի զանազան կողմերից և արտասահմանից տեղում էին շնորհաւորական հեռագրներ: Հեռագրներ ստացւեցին և օտար պետութեանց Անգր-կովկասի ներկայացուցիչներից, Վրաստանի և Ադրբէջանի խորհրդարաններից ու կառավարութիւններից: Համաժողովրդական ցոյցեր ու հանդէսներ եղան և գաւառում: Մասնաւորապէս շքեղ էր հանդէսը Կարսում, յունւ. 2A-ին, ուր տեղի ունեցաւ համաժողովրդական միտինգ ու զօրահանդէս: Անկեղծ ու անբռնադրօսիկ խանդավառութեամբ էր ասնում ժողովուրդը իր անկախութեան ճանաչումը:

Յունւար 26-ին Երևանում գումարեց Արհեստակցական Միութեան Սորհրդի անդրանիկ նիստը մասնակցութեամբ 13 միութեանց 38 ներկայացուցիչներին—կօօպերատիւների, աւտորաժնի, դեղադործների, ուսուցչական միութեան, փոստ-հեռագրական պաշտօնեաների, քաղաքային ինքնավարութեան ծառայողների, բանկային ծառայողների, կաշւի գործարանի աշխատաւորների, երկաթուղային բանւորների, ջուլհականոցի, տպագրական բանւորների, հացթուխների և որբանոցների ծառայողների միութիւնների:

Ժողովը քննեց ու վաւերացրեց Միութեան կանոնադրութիւնը և ընտրեց Միութեան գործադիր մարմին, որի մէջ մտան Աղաջանեան Ա., Մուշեղեան Տ., Պոպով, Աբգարեան Մ., բժ. Նազարեան Բ., Վարդիկեան Ս., Տէր-Չաքարեան Գ. և Հախվերդեան Ա.:

Ժողովի զբաղումի առարկայ եղաւ նաև Հայաստանի դէ Փակտօ ճանաչումը: Ընդունեց մի բանաձև, որի մէջ արտայայտում էր հայ աշխատաւորութեան վերաբերումը. «Միութիւնների Միութեան անդրանիկ խորհուրդը, ասում էր բանաձևը, ողջունում է հայ աշխատաւորութեան և նրա կառավարութեան այս յաղթանակի համար, որը յաղթանակի մի քայլ է հայ քաղաքական ազատագրութեան տեսակէտից: Միութիւնների Միութեան Սորհուրդը հաւատում է, որ Հայաստանի կառավարութիւնը թոյլ չի տայ, որ ստացւած ազատութիւնը ծառայէ որևէ իմպերիալիստական պետութեան շահերին և Հայաստանի պետական նաւը կը տանէ դէպի Հայաստանի աշխատաւորութեան բարօրութիւնն ու սոցիալիստական նոր